

INDIA MISSION FIELD TLYNA REPORT

Biehmiapa : Khokheina sahchaipa na patosa ta,thatlona ta na deichhy tuhpa ei Khazoh Chonochaipa nata Evangelical church of Maraland Awnanopa member zydua hnohta a lyna bie reih na ta, India mission field ei tly chhohta ei office rai na baokha tuhpa zy- Assembly nopawpazy, Awnano nopawpazy, Office ministerial Staff zydua hnoh chhaota alyna bie ei reih hmeiseih. Ei khitly chhohta rairuna patluapa ei tyh tla leina chhapa chhao he Awnanopa thlahchha kheina vata cha ta, ei ly ngaita.

Odhissa tlyna : Evangelical Church of Maraland nata Restoration India Mission ahrialahna zy mopathi byuhna vata nata eima Missionary nawhzy ama tyuduana mokhei a byuhpa vata tari 16.9.2014(Tue) nohta Bhubaneswar tlo na ta, Rev. Dr.L.R. Colney O, Quest House liata na patlosa ei ta, Tari 17.9.2014(Wed) nohta eima hrialahna zy cha mohpathi pi ta, he khai tawhta Restoration Home zy na patlysa ei ta, he Home liana heta Chapaw hawti 56 tlai vaw mohhoh ei ta, he Chapaw hawti 56 pa zy he Krizyhpataola ama pataosa nota ama no nata paw zy ta ama thisai hapa zy ama cha. Atako liana khata he Home tawhna heta Chapaw hawti 6 zy cha Matric passed ei ta, a mohhohpazi tuhpa zy ama hnei khao leipa vata a hneirohpazy viachao lao pabasa pa ta, nohsapa nata vasuapa hry liata ama daihti zy cha ama hmah nga hai. Thapasa a chhah ngaita.

Baliguda khah tlyna: Eima Missionary nawhzy tyuduana mokhei awpa ta ei zuna chhapa a chapa hawhta tari 18.9.2014(Thurs) nohta Cuttack tawhta Baliguda pangai pata sie pi ta, Baliguda khah yna he Cuttack tawhta Kilometres 310 hryh a hlapa cha ta, Kandamal District chhoh liata a ypa a cha. He District he Krizyhpataola ama pataosana district kha cha ta, atanoh taihta a rahchhoh he thlahoh a chhah tu mah vei. Eima Missionary Beirona Hlovyh cha he ti nata rah liana heta a ypa a cha. Eima tlo za ta eima zydua ta Abeipa lata thlachha paraohna zy hnei pi ta, eima ly ngaita kaw. Missionary chana palasa ngah nawpa su cha mah vei. Abeipa ta Awnanopa thlachhana zy maniah chyh-ei aw ta, thlaita Thatihpa eima chho thei cheingei aw tahpa deikua eima hnabeiseih.

Sambalpur tlyna : Sambalpur khih he khih ngiatlah a cha kawpa nata alaluah kawpa cha ta, India rah liata titohpa laichaipa yna su cha ta, cha ti tohpa moh cha, Hirakud titohpa ama tah. Ko 1957 January 13 pa noh liata India rah chhithatuh rohnapa Puhpa Nehru ta a pahypa a cha. He su liana heta eima Missionary S. Lamo nata a chhohkha pahra ei ta, eima tlo za tawhta a pakhyh lyima pi ta, ano he Awnanopa a y chiehpa, Thlahpa Pathaihpa ta khacha a ypapa Awnanopa mohhoh pa ta, atlahleipa zy chata thlachhana zy thata hnei tyh ei ta, ama chakaona zy a thoh ngaita kaw. He chakaona tawhna heta Hindu pa nata zyhna hropa tawhta Krizyhna lata avaw paliepa he chyhsa hluhpi ama cha ha ba. Eima Awnanopa member zydua ta tiama viapa ta thlah eima chhakhei awpa angiah ngaita kaw.

Cuttack lata alie lilawna : Sambalpur tawhta Missionary zy S. Lamo nata Beirona Hlovyh zy chhaota Cuttack lata siepa ta my dawh 6:00Am pata a thao heih pita, zala dawh 5:00Pm pata aly ngaita pata eima tlo. Abeipa chhithana vata Odhissa field liata eima ECM Awnanopa ta eima chakaona su zydua liata thlachhana hnei khai theipa ta ei ypa vata Abeipa nata thlah na chhakheituhpa zydua hnohta alyna bie ei reih hmeiseih. He Cuttack lata ei lie lilawna noh he tari 20.9.2014(Sat) nohta a cha.

Cuttack liata biereina: He he tari 21.9.2014(Sun) noh liata programme ei hmana dah a cha. My dawh 10:00Am pa tawhta a pakhyhna hnei pita, Kandamal District liata Krizyhpa taola ama pataosa nota ama no nata pawzy ta ama vaw thisai hapa hawti 56 zy chhaota Abeipa achhy khohna daihti khochhih ngaita kawpa hnei pita, eima ly ngaita kaw. He liana heta Abeipa bie tawhta bietana nata pasyuna bie reina zy hnei na ta, hawti penawhzy chhaota mothlih chhaota Abeipa reithai ei ta, no-ai lei kawpa ta eima daihti cha nohchho dawh 12:30Pm pata eima pachha. He eima pakhyhna su he Rev.Dr. L.R. Colney O liata a cha.

Odhissa Mizo Association liata ei pakhy: Nohchho dawh 1:30Pm tawhta Puhpa Lal hriatrenga O liata a pakhyhna hnei heih pita, he liana heta Odhissa liata Tlaikaopa a ypa zydua a tyh pakhy pata Abeipa a chhyhna daihti eima hmah heih. Eima programme a chha tawhta my pati niena zy chhao eima hneipa hra.

Bhubaneswar tawhta Delhi pangaina: Kathmandu direct flight a y leipa vata Bhubaneswar tawhta za dawh 9:00Pm pata Delhi pangai pata sie heih na ta, za cho dawh 11:00Pm pata Delhi tlo na ta, Satlia Delson Notlia ta Airport liata na vaw dy ta, a ly ngaita pata Mizoram House pangai heih pita, he hawhta satlia veihseihpa nata maniah a uasapa ei vaw tyh thlah hapa he vahnei ei tah hmeiseih. He zydua he Awnanopa ta thlah maniah nama chhakheina theilapa a cha tah lei thei vana. Abeipa chota ei ly hmeiseih. He he tari 21.9.2014(Sun) nohta a cha.

Delhi tawta Kathmandu pangaina: Tari 22.9.2014(Mon) noh my dawh 7:20Am pata Nepal khihpi Kathmandu pangai pata sie heih na ta, Abeipa chhihthana vata my dawh 9:00Am pata aly ngaita pata ei tlo. He liana heta Church of Faith Awnanopa liata ama Pastor Prem Karki nata eima ECM missionary Puhpa Lalrinkhuma zy ta na vaw dy ei ta, ei ly ngaita. Pastor Prem Karki 0 lata thlai pangai pita, cha liana chata Pastor Samuel Mang, Nepal Field Supervisor chhao sapa chiehlei ngaitana chota hmia zy avaw hmo pi ta eima ly ngaita. He hawhta Kathmandu ei tlyna chhapa he Church of Faith Awnanopa ta a hrialah awpa ta miah ama chhopa a chadaipazi pata, ES(Misn) ta field a tly tita ama thatihzy a sia kawpa ta a vaw chu mawh sy tahpa bie a laichadaina a cha.

Church of Faith Leaders zy a pakyhna: Tari 23-24.9.2014 taihta Kathmandu khihpi liata Awnanopa sahrawh a pazao pakhyapa Pastor nata nopaw viapa zy chhaota a pakyhna hneipa cha ta, he liana heta Pastor Samuel Mang nata Missionary Lalrinkhuma zy chhaota eima zydua ta a pakyh pita, eima pakyhna liana chata, Church of Faith Awnanopa a vaw duahna dah zy, Mawrah Presbyterian nata Baptist Awnanopa chhaota a hrialah awpa ta vaw chho tyh ei ta, chahrasala ama paryhsa leina kyh zy nata ECM Awnanopa tlaita mohhoh awpa ta ama khona kyh nata a byuhna hawhta deichhy ta palaiseihsa awpa ta ama khona nata nohkhah zy vaw sie via laih sala ama moh liata **Evangelical** tahpa bai awpa taihta ama khoh thlahna kyh zydua chhao maniah chho ei ta, thapasa ama chhih ngaita. Kathmandu khihpi he District sathoh pahlyhpa khihpi ta taopa cha ta, a chyhsa pahrapa zydua he 6 Millions hryh cha ei ta, Krizyhpah maluh deikua 12% deita ama cha. Eima ECM Awnanopa chakaona rah pakawh nawpa nata eima pa-i via nawpa chata Abeipa ta miah a chhuahnoh chhieliepa hawhta pacha thei sihla kho a chhih kaw thlyu aw.

Dharan la tlyna: Eima ECM Awnanopa yna nata pahrana chaipa tly awpa ta tari 24.9.2014(Wed) noh zala dawh 3:20Pm pata sie pi ta, zala dawh 4:00Pm pata Bhiratnagarh tlo pi ta, he tawhna heta taxi ta sie heih pi ta, zala dawh 5:30Pm hryh liata Pastor Samuel Mang pahrana O cha tlo pi ta, eima ECM Awnanopa ta a mohhoh haipa Awnanopa member zyta maniah vaw mokhah ei ta, eima ly ngaita kaw. Dharan liana heta noh no(2) chhoh chah na ta, a nohkhana tari 25.9.2014(Thur) noh liata Awnanopa member zydua chhaota Abeipa mohta a pakyhna zy hnei pi ta, eima tha a pha kaw. A nohnona tari 26.9.2014(Fri) noh ta deikua cha Achhyna O sa nawpa ta rah zy tlua laih pi ta, chatanachata, za ta Pastor Samuel Mang, Lalrinkhuma, J. Amos zy chhaota apakyhna eihhrahpa hnei heih pi ta, Abeipa liata thlahchha khohna zy hnei pi ta, eima tha a pha ngaita pata ei pahno.

Arunachal field tlyna : Awnanopa thlahchha kheina vata Abeipa ngiachhiena to pata Odhissa nata Nepal field ei vaw tly khai hapa vata Abeipa liata thata ei ly hmeiseih. Tari 1.10.2014(Wed) noh my dawh 6:00Am ta Tezu pangai pata sie pita, lapi zy eima pahno pasia leipa vata za dawh 8:30Pm pata Tezu khih Pastor Lalnunhlina, Bonny. Lalthianghlina, nata Hc. Lalbiaksanga zy yna cha aly kawpa ta tlo pi ta, eima rie zy thei kaw hra sala, eima missionary nawhzy hmia eima hmopa cha eima lyna a poh ngaita. Tari 2.10.2014(Thur) noh my ta Mishmi Baptist Christian Council chhithatuhpa zy a pakyhna hnei pi ta, eima hrialahnazy chhao saichaneina hnei pi ta, nohchho daihti tawhta zala taihta Prayer Centre liata Abeipa mohta akaona zy hnei heih pi ta, eima y thlah no cheingei ta a tlahleipa chata thlahchhana zy hnei pi ta, eima thlahchhanazy chhao Abeipa ta maniah a chyh-ei kawpa ta ei pahno. He thlahchhana O yna he eima ECM Awnanopa ta eima chakao viana Area chhoh liata a ypa a chapa vata nohchareih heta daihti ruapa raita y vei. Ngiapa thiehpa eima hmona chaipa a chapa vata eima Awnanopa chhaota thata thlah eima chhakhei awpa a ngiah ngaita. He Prayer Centre liana heta thlahchhakhei a byuhpa zy a rie pakhy ei ta, a hripa ta a pabuapazy chhochhi cha zacho ta zy a ra papua tyh ei ta, fencing a y leipa vata a mohhohtuhpa zy cha chhaota Case a ao tlamaw nawpa a nao ngaita kaw. Thlahchhana nata baona ama ngiah ngaita kaw. Tiama papua via awpa a byuh ngaita.

Mishing field tlyna : Tari 3.10.2014(Fri) noh my dawh 8:00Am pata Arunachal field, Tezu khih tawhta Mishing field pangai pata sie heih pi ta, aly ngaita pata za dawh 9:30Pm pata Pastor C.Khaisa yna su cha tlo pi ta, eima tlo hawh kawpa vata ahy hmahta a pakyh hma khao ma pi. Mishing field liata Pahanoh a hmah awpa ei chapa vata a pakyhna daihti chhao pachhuahpanoh mah hra ma pi.

Masgoan la tlyna: Tari 4.10.2014(Sat) noh my dawh 6:00Am pata Missionary M. Ngochho nata chhohkha yna la pangai pata a thao heih pi ta, ama yna he Kilometre 280 hryh a hlapa a chapa vata nohchho dawh 12:00 pa liata tlo pi ta, Missionary M. Ngochho ta a mohhoh haipa Awnano penawh zy yna lata thlai palah pi ta, Abeipa mohta akaona zy hnei pi ta, eima ly ngaita kaw. He Awnanopa zy ta ama ngiah ngaitapa maniah ama chhopa deikua cha sikul he a cha. Eima Awnanopa heta ama hawpa maihta tao thei lyma tlai sihla byuh a chhah ngaita.

Mishing field liata Pahanoh hmana: Tari 5.10.2014(Sun) liata Mishing field Mission Compound liata Pahanoh programme hmah pi ta, My a pakhyna liata Maisah chakaona zy hnei na ta, zawpi a pakhy penawh zy chhao ama tha a pha ngaita. Ama hry liata y no-ai a chhah leipa ta, Abeipa ama reithai khoh ngaita kaw. Abeipa bie tawhta pasyuna bie zy reih na ta, no-ai tah lei kawpa ta eima pakhyna cha pachha pi ta, eima daihti zy a cha-ie kawpa vata my pakhy bah tawhta eima Missionary nawh zy nata Awnano penawh zy tly lyma heih pi ta, Abeipa mohta akaona zy hneipa ta thlahchha khohna zy hnei lyma pi ta, eima tha a pha ngaita kaw.

Za daihti liata eima Missionary zy chhaota Pastor C. Khaisa 0 liata a pakyhna daihti a no-eih tlaita hnei heih pi ta, eima daihti hmiatuapa liata Abeipa bie tawhta ei phana rakha ta pasyuna biereina zy hnei tua na ta, thlahchhana zy ei hnei khai tawhta eima chakao lyma nawpa liata eima rei a raoh via lyma thei nawpa ta nata hiahrina a tao khohpa zy chata daihti pahypa cha ta, a chhyna zy eima hnei khai tawhta eima zydua thlahchha paraohna zy hnei pi ta, eima ly ngaita kaw.

Tiwa field tlyna : Awnanopa thlahchha kheina vata Abeipa ngiachhiena to lyma pata Tiwa Mission la cha Tari 6.10.2014(Mon) noh ta sie pi ta, zala dawh 4:00Pm hryhta tlo pi ta, Tiwa field liata eima Awnanopa mohhoh haipa zy nata eima missionary zydua chhaota Director Quarter liata maniah mokhah ei ta, eima ly ngaita kaw. Abeipa lata thlahchhana zy eima hnei khai tawhta eima programme hma nawpa kyh zy reih pi ta, zala nie khai tawhta deikua cha Tiwa

Evangelical Church Leaders zy chhaota ano-eih tlai ta a pakyhna zy hnei pi ta, cha liata ama rei chaipa cha, Director pie heih awpa ta ama khona nata Director Quarter he Tiwa Evangelical Mission nata Tiwa Evangelical Church Office chata pahmasa pazao awpa ta ama khona kyh zy he a cha. Zacho dawh 12:00Pm taihta eima pakyh.

Tari 7.10.2014 (Tue) noh my pati nie khai tawhta Tiwa Evangelical Mission Missionary zy chhaota a pakyhna hnei heih pi ta, Abeipa bie tawhta ei phana rakha ta eima chakao lyma nawpa liata thatlona nata phahnai ngiahna eima hnei via lyma thei nawpa ta pasyuna bie zy reina hnei tua na ta, cha nota Mission field ei vaw tly chiehpa tawhta field report zy chhao pie ei na ta, cha khai tawhta Missionary zy tawhta ama hiahri khojpa nata ama pachana zy reih hra awpa ta hruapa cha ei ta, cha hawhna chata noh yta apakyhna zy hnei pi ta, eima daihti zy chhao miah a daih lei kawpa ta ei pahno.

Tari. 8.10.2014(Wed) noh my ta Missionary N. Beichosa nata chhohkha ta hawsaih khochhih ngaita kawpa ama hneina zawzi ta pati nie miah vaw hrua ei ta, ama chhohkha chata thlahchhana zy chhao hneikhei pi ta, cha khai tawhta Meisavaih Awnanopa ta Achhyna 0 ama sapa zy nata Siaha College Vaih KNP Branch ta Umsetri liata Achhyna 0 ama sapa zy chhao ala ta va tly heih pi ta, A lana dah liata cha a sano heta tiama papua via chy awpa a ngiah ngaita kawpa ta ei pahno. Abeipa Kihnarah nata a Awnanopa chata eima pasai daidao tawhta cha a patoh viapa ta sa lyma thei sihla byuh a chhih ngaita kaw. A sa tuhpa zyta miah ama chhona zie liata cha a sa nawpa soh he thlaita eima hmo thei tyh leipa vata a chhaichhi eima chalei chiehpa thophiapa nata hmo hropa zy he thlaita maniah rao khah ha tyh ta, rairuna eima tyh kaw tyh ama tah. Umsetri chhochhi cha thotlah la cha ta, sao daihti liata a chhaichhi peimawhpa a so pakhy thai awpa cha leipa ta, chahva nohkhah phana daihti liata a so pakhy ta, sa lyma awpa a byuhpa a chapa vata a ryhpaoh thei khihtala a patoh viapa ta soh zy chhao paphao theipa cha thei sala kho a chhih kaw thlyu aw. Phahnai a ngiah via a byuh thlyu aw.

Agartala tlyna : Tari 11.10.2014 (Sat) noh my dawh 3:00Am pata Shillong tawhta Agartala pangai pata sie pi ta, rairuna eihhraha y tla leipa ta Abeipa ngiachhiena vata za dawh 8:30Pm liata aly ngaita pata tlo pi ta, eima Director nata chhohkha chhaota a ly ngaita pata maniah vaw ly ei ta, eima ly ngaita. Ei siena zy a vaw rei kawpa vata ei rie zy vaw thei pa kaw ba ta, chavata Pahanoh deikua cha pua thei leipa na ta, my tawhta a paha na ta, Hriatuanoh my tari 13.10.2014 deikua cha eima missionary zydua chhaota Abeipa mohta akaona zy

hnei pata my tawhta a pakyhna zy hnei pi ta, zala pati zy niepa pi ta, eima daihti zy miah a khi lei ngaita kaw. Cha liata eima bierei chaipa cha, Tripura field liata eima chakaona dah panano awpa a pha nata pha lei kyh zy, Association sa pangawh liata cha leipa ta, sathoh liata chakao sihla a pha via aw ma tahpa zy, Tripura liata eima hrialah penawh native pastor zy nata evangelist zy Thlahpa Pathaihpata nata a raihraia ama pyh thai lei zie zy, thlahchha bao ama ngiah zie zy reih pi ta, bie chhana deikua tao ma pi, pachapazi awpa ta eima soh. Cha liata pei ei tah kawpa deikua la Sinaikami Local Church heta eima ECM Missionary zy he missionary hawhta maniah a pyh leipa ei ta, a tahma ta a y penawh dei cha leipa ta, hmiala ta eima sopa thokha zy chhao missionary ta a vaw pyh thei tla vei ei. Ama Awnanopa liata khapa Programme rai pachhuhpanoh hra ei sala, eima ECM Missionary nawhzy cha programme lia raita tovyuh pie khoh hlei vei ei. Cha nota Sinaikami School liata a hyutuhchaipa chata eima ECM missionary hry tawhta zy a soh tyh pi ta, missionary ta miah ama pyh thei leipa khihta cha, pacha chhie a chhih kaw thlyu aw. Eima Awnanopa heta ko 1 ta Rs 10,00,000 :00 hryh hryuh tyh tloh pi ta, Thlah eima chha via awpa a byuh thlyu aw.

Bie tlahpakyna : Abeipa phana vata ko 48 chhoh Rahzohpa chakaona rai eima vaw hriana, a via pachaipa ta India rah liata eima ECM ta mission field a hneipa zy – **Nepal field, Tiwa field, Mishing field, Arunachal field, Odhissa nata Tripura field** zy cha Awnanopa thlahchha kheina vata a phapa ta vaw chahryh khai thei na ta, ei siena lia maihta na deichhy ta, na baokha lyman tuhpata zy hnohta Chonochai Khazohpa mohta alyna bie ei reih hmeiseih. Abeipa heta eima ECM Awnanopa he chiehlei ngaita hra ei sihla, khizaw pakhaihsa tuh awpa ta miah a tlyh hmeiseih tahpa pahno pata, hnohsy leipa ta Thlahpa thapasana hnei via lymana chota hmiala toh lyman ei suh u.

‘ Eima diathla leipa khihta la a daihti ta liata hria tloh aw pi ta ’

Ei cha ly kaw.

Rev. T. Salaw
Executive Secretary (Mission)

